





Digitized by the Internet Archive  
in 2019 with funding from  
Wellcome Library

<https://archive.org/details/b30775048>



# DIURESEOS PROVOCAZIONE UTILI ET NOXIA,

QUAM

SUMMO ADSPIRANTE NUMINE  
ET  
CONSENTIENTE GRATIOSA FACULTATE MEDICA  
PRÆSIDE

NO. GEORGIO DANIEL  
COSCHWITZ,

D. DOCT. EIUSDEMQUE IN ACAD. FRIDERICIANA PROF.  
PUBL. ORDIN. ET POTENTISS. PORUSS. REGIS IN COMITATU MANS-  
FELDENS. ET APUD PALATINOS HALENS. PHYSICO  
MERITISSIMO

*PATRONO AC PROMOTORE OMNI HONORIS CULTU DEVENERANDO*

## PRO LICENTIA

GRADUM DOCTORIS, SUMMOSQUE IN ARTE SALUTARI  
HONORES CAPESSENDI

HORIS ET LOCO CONSUEVIS

*Anno M DCC XXIV. d. April.*

Publico & Placido Eruditorum Examini subiiciet

IOHANNES ANDREAS ANHAUSEN,

GREUSS. THURING.

---

HALÆ MAGDEBURGICÆ.

Typis IOH. CHRISTIANI HILLIGERI, Acad. Typogr.



DEO  
ET  
PATRIÆ





## PROOEMIUM.



**E**Xcreta atque Retenta ad illas res pertinere, quibus sanitas & vita nostra conservatur, adeo vulgatum est inter medicos, ut neminem qui scholas medicas in primo limine salutavit, & de Rebus non naturalibus quidquam audivit, latere queat. Cur

autem excretiones adeo necessariae sint ad conservationem vitae ac sanitatis, id jure aliquam indagationem meretur: cum enim videamus, principaliter conservationem corporis per nutritionem absolvi, eamque ingestiones, & materiae nutritivae adpositionem pro fundamento habere, haud sine omni fundamento quis dubius haerere poterit circa excretionum necessitatem & utilitatem. Verum, etiamsi illis qui ordinem naturae in conservatione corporis nesciunt, excretionum necessitas dubia videatur, longe aliter tamen sentient illi, qui eundem ordinem cum legibus huc spectantibus magis perspectum habent. Hi enim probe sciunt, quod corpus nostrum, in salvo manentibus ingestionibus, ad immensam usque molem augmentari necesse haberet, eamque mobilitati corporis contrariantem, si omnia quae ingeruntur in corpore manerent, neque per aliquam excretionem minue-



rentur. Præterea autem probe perpendunt, ipsam corporis nutritionem per solam ingestionem alimentorum non absolvi, quamquam ultimus huc spectans actus revera in materiæ nutritivæ successiva adpositione consistat: sed cognitum ipsis est, materiam hanc nutritivam non ita puram atque defoecatam, uti ad negotium nutritionis requiritur, & mixtioni corporis nostri conveniens aestimatur, cum alimentis suppeditari, sed potius multis partibus impuris ac quisquiliis involutam existere, ut separatione puri ab impuro indigeant, & id quod purum constituit, in corporis nutrimentum impendatur, impuritates autem tanquam rejiculae ab hoc negotio excludantur. Nec minus perspectum habent, partes illas alimentorum rejiculas, salinas, sulphureas, mucidas, terreas, variique generis esse, quæ, si, licet separatæ, in humoribus aut corpore detinerentur, mixtioni animali adversæ essent; eamque diversimode lædere possent, ideoque secundum rationis dictamen concludunt, partium illarum excretionem necessariam existere.

His omnibus desuper accedit, quod ipsi humores corporis nostri proprii ita constituti sint, ut sub perpetuo motu circulatorio, transpressorio, & intestino, facili negotio in varias partes excrementitias resolvantur, quæ sui eliminationem poscunt. Quibus si ad latus ponamus quotidianam experientiam, facile adparebit, sanitatem illorum longe firmiorem esse, quorum excretiones debito ordine atque vigore succedunt, quam ubi hæ variis successuum impedimentis subjiciuntur.

Hæc inquam omnia si juste perpendantur, satis superque testantur de necessitate excretionum in corpore vivo obtingentium; & summum creatorem in eo maxime conservationi hominis prospexisse, quod tot & tanta organa constituerit excretoria, per quæ impuritates diversi generis foras eliminari possunt.

Non



Non enim solus venter obtinuit craſſiſſimæ excretionis organum, per inteſtinum rectum, quo partes alimentorum recrementitiæ craſſiores & penitus fœculentæ ejiciantur, ſed quemadmodum in illo locus quoque excernendæ colluviei crudioris ſeroſæ reperitur, ita & caput, & thorax ſuis gaudent emunctoriis, quæ nares & fauces cum aſpera arteria ſuppeditant; & mucidis excretionibus favent: nec ſolæ cavitates hoc privilegio gaudent, verum in tota corporis, cutisque ſuperficie innumera excretoria reperiuntur, ſub titulo pororum cognita, e quibus particulæ ſeroſæ ſubtiliores, cum ſulphureis halituolis, imo peregrinis aliquando, & miasmaticis, protruduntur.

Cum itaque hæc neceſſitas excretionum in homine vivo legibus naturæ firmata ſit, non mirandum erit, quod Medici eandem non ſolum inculcare conentur, ſed, ſi forſan defectus aliquis in hoc negotio occurrat, conſilia quoque conferant, ut arte ſuppleatur, quidquid ab ipſa natura aliquando denegatur aut retardatur; atque in hunc finem omnem remediorum farraginem perquirant, ut inveniant, quibus ſive hanc, ſive illam excretionum ſpeciem provocare, concitare, facilitare valeant:

Quemadmodum autem vix ac ne vix quidem in hoc mundo quidquam ſenſibus noſtris offertur, quod non ex altero latere conſideratum, ſui commendationem urgeat, ex oppoſito autem deliberationi noſtræ ſubjectum, ſui averſationem ſvadeat, ita ſane prudentiores medici id ipſum abundanter cognoverunt circa evacuationum artificialium provocationes: unde tot regulæ, tantæque cautelæ natæ ſunt in Medicina practica, a medicis obſervandæ, ne evacuationes in ſe utiles & bonæ, ex neglectu debitarum circumſtantiarum peſſimum effectum poſt ſe relinquant.



Nos impræsentiarum eidem viæ insistentes pro THE-  
 MATE INAUGURALI unam evacuationum solenniorum  
 selegimus, nempe Evacuationem Diureticam: & quoniam  
 circa hanc, æque ac circa alias excretiones, aliquando de-  
 fectus, si non semper in totum, tamen in tantum occurrit,  
 necessitas quoque urget, ut pro re nata vel facilitetur, vel  
 positive excitetur; atque in hunc finem remedia huc spe-  
 ctantia exhibeantur. Cum autem Experientia varios sup-  
 peditet casus, per quos docemur, non semper æque facile,  
 aut æque utile esse, Diuresin provocare, quin potius satis fre-  
 quenter eventus atque effectus sequantur, intentioni vel plane  
 non respondentes, vel gravissima symptomata secum feren-  
 tes, haud male nos esse acturos confidimus, si in præsentī  
 Differatione Utilitatem provocatæ Diureseos, æque ac ipsius  
 Noxas, si intempestive suscepta fuerit, perpendamus, ejusque  
 necessitatem ac utilitatem ex indicantibus, noxas autem ex  
 contraindicantibus deducamus, atque hac ratione verum il-  
 lius usum demonstrems. Quod ut feliciter in ægrorum so-  
 lamen cedat atque succedat, SUMMUM NUMEN, ut vi-  
 ribus corporis & ingenii clementissime nobis succurrat, sup-  
 plices veneramur.

### §. I.

De Diureseos Provocatione utili & noxia nobis actu-  
 ris, statim in limine procul dubio incumbit, ut definiamus,  
 quid per Diuresin, ejusque provocationem intelligamus,  
 quo tanto facilius progressus in deductione utilitatis aut no-  
 xæ fieri possit. Circa Nominis definitionem haud erimus  
 prolixi, sed satis nobis erit indicasse, Diuresin quoad origi-  
 nem, vocem esse græcam; compositam ex præpositione Δ,  
 & ούρης, derivatam a verbo ούρεω, mingo, aut Urinam e-  
 mitto. Unde sub hac voce intelligimus actum mingendi,  
 seu excretionem illius materiæ salino sulphureo serosæ, quæ

ex



ex sanguine & reliqua humorum massa in renibus sequestrata, per uretheres ad vesicam urinariam demandatur, & tandem sub Urinæ titulo voluntarie per urethram emittitur. Per Diureseos Provocationem autem intelligimus artificium medici, quo per debita remedia, hinc diuretica dicta, hanc excretionem, vel naturaliter quidem præsentem facilitare, promovere, & augere, vel deficientem positive provocare & excitare studet atque conatur.

§. II.

Est itaque materia hujus evacuationis liquidum aliquod, Urina vocatum, omnino excrementitium, cum nulum post sui secretionem corpori præstet usum. Conflata enim est Urina ex partibus aquosis, sub quibus colluvies partium salinarum & sulphurearum crassiorum, nec non terreo mucidarum, in conspectum venit; & quarum præsentiam tam sapor, color, & odor; quam sedimenta ad fundum secedentia, variaque per artem chymicam producta spirituosas atque salina volatilia, respective sufficienter probant: Quo intuitu hæc excretio generaliter respondet excretioni periphericæ, quam Diaphoresin vocamus, quoniam per illam similis quoad essentiam materia excernitur: in sudore enim haud secus salinæ, sulphuræ, aqueæ, & submucidæ partes sese produnt; ac mediante sapore, odore, ac colore deprehenduntur: in eo tamen a materia per Urinam excreta differunt, quod hæc longe crassior sit crudiorque præ illa, propter diversitatem organorum secretioni dicatorum, cum glandulæ cutis, per quas sudor excernitur, longe densiores existant, porisque arctioribus & minoribus dotata sint, ideoque rudes crudasque illas particulas transmittere nequeant. Sequestratur autem hæc substantia serosa excrementitia ex Massa humorum confusanea, quam sanguinem appellamus, qui non modo ab alimentis quotidie ingestis varia



rias partes excrementitias minusque laudabiles sub chylo communicatas, recipit, sed sub ipso motu circulatorio, & per partes porosas transpressorio, facile sub motus intestini accessu in similes partes resolvitur, easque postmodum enexu suo dimittit: ne, si diutius in ipso remanerent, ejus mixturem turbarent, aut ad minimum acrimoniam ipsi contraherent valde noxiam.

### §. III.

Organa quod concernit evacuationi nostræ dicata, hæc sese dividunt in secretoria, asservatoria, & excretoria. Secretionis organum constituunt Renes, in quorum corticali aut vasculosa substantia terminantur vasorum arteriosorum & venosorum emulgentium ramificationes, quarum illæ sanguinem hic depurandum adferunt, hæ vero eundem a partibus illis recrementitiis liberatum ad Venam cavam revehunt. Secedit itaque hæc salino sulphurea portio sub forma liquida in modo dicta substantia renum vasculosa, per ipsius poros huic secessioni crassiori adaptatos: donec sub motu, tam sanguinis transpressorio, quam renum leniter tonico & strictorio, ad eorundem substantiam medullarem, quam Bellinus tubulosam esse demonstravit, perveniat, atque per ita dictos tubulos urinarios Bellini in cavitatem renalem, quæ Pelvis audit, depluat & successive quasi colligatur. Et cum pelvis in renibus conspicuus non nisi expansio sit continua Uretheris, hic proxime in utroque latere succedit, tanquam ductus renum excretorius proprius: quoad substantiam membranaceus, ex tunica triplici, communempe a Peritonæo oriunda, musculari tenui, & nervea interiore compositus: a renibus ductu paululum incurvato, & sub inæquali crassitie ad vesicam urinariam tendens, cui ab utroque latere ita implantatur, ut intra duplicaturam lamellarum membranosarum vesicam constituentium, per

nota-



notabile spatium progrediatur, suamque per aperturam, urinam a renibus receptam, in cavum vesicæ dilabi patiatur. Vesica itaque urinaria est organum asservationis & collectionis: hæc enim ex tunica membranacea, muscolari, & nervea composita, corpus cavum pyriforme, in pelvi abdominis situm habens, constituit atque efformat; quod dilatabile est, & bonam urinæ quantitatem capere potest, dum successive expanditur; simul tamen ob fibrarum musculoso carnosarum stratificationem tam longitudinalem, quam transversalem, constringendi vim habens: quo materia serosa in vesica collecta pro necessitate expelli queat. Unde recte vesicæ adscribitur officium, urinam partim retinendi, partim etiam excernendi; quamprimum enim ab Urina collecta sufficienter expansa fuit, aut citra expansionem a materia salina vellicata & stimolata in tunica interiore nervea, mox inde fit sensationis molestæ communicatio, per nervos, quos vesica ab intercostalibus & osse sacro accipit, ut inde natura motum per eosdem nervos incipiat, qui fibris carneo musculosis communicatur, quo illæ stringuntur, parietes aut latera vesicæ ad invicem comprimunt, ut materia inclusa per viam proximam, proximeque patulam extrudatur, ad quem motum extrusorium haud parum quoque conferunt muscoli abdominis & Diaphragma; id quod quisque in se ipso sub nisu, & pressione aeris concurrente experiri potest.

#### §. IV.

Cum autem hic motus excretorius in statu naturali maxime sit voluntarius, & a voluntate nostra dependeat, sapientissimus rerum Conditor huic negotio ita prospexit, ut in collo vesicæ repagulum quasi positum sit, ne Urina præter voluntatem hominis effluere possit. Hanc ob rationem hic loci positæ sunt fibræ transversales colli vesicæ extre-



mum ambientes, atque in Viris cum intestino recto, in fœ-  
 minis cum Uteri vagina connexæ, quæ orificium vesicæ  
 claudunt, & sub emissionē Urinæ, ejusque expressione di-  
 latantur, & quasi relaxantur; remittente autem motu pres-  
 forio in fundo vesicæ, iterum stringuntur & coarctantur.  
 Huic demum parti in ordine succedit ipse ductus excreto-  
 rius proprius; quem Urethram appellamus, & pro diversi-  
 tate sexus nunc breviorē nunc longiorē deprehendimus.  
 In fœminis enim haud tantum elongatur hic ductus, sed in-  
 tra labia pudendorum, infra clitoridem & os pubis, subter  
 nymphas absconditur; cum ex opposito in Viris per totum  
 membrum virile continuetur: in quibus hic ductus aut ca-  
 nalis membranofus, ex duplici tunica validiore compo-  
 situs, sulco ab interstitio duorum corporum cavernosorum  
 efformato insinuatus reperitur, ibique non solius Urinæ,  
 sed simul spermatis excretioni inservit; & pro tanto faci-  
 liore hujus negotii expeditione, liquido aliquo mucido in  
 facie sua interna oblinitur, quod glandulæ partim a Cou-  
 pero, partim a Littrio observatæ suppeditare creduntur.

#### §. V.

Modum evacuationis diureticæ naturalem si adum-  
 brare velimus, haud incongrue dicitur, eam absolvi partim  
 strictione, partim relaxatione fibrarum, quarum priorem cau-  
 satur stimulus salinus & acris, posteriorem vero liquidum  
 aqueum, & mucidum, nec non ipse motus fibrarum stric-  
 torius. Urinam enim ipsam materiales proximam causam  
 esse, quæ acrimonia sua salina nerveam vesicæ membranam  
 stimulare, sensumque ibi molestum efficere potest, a nemine  
 facile negari poterit, qui compertum habet urinam salinis  
 partibus crudioribus atque copiosis scatere, nerveasque  
 membranas, & quidem quo magis tensas, maxime sensibiles  
 esse. Quod autem revera ejusmodi stimulus in vesica, ab  
urina



urinā contingāt, facile quilibet in se ipso experietur, quando vesicam ab Urina distensam non modo, sed revera vellicatam percipit, molestumque sensum hinc sentit. Ordinem quod concernit, quo una alteram producit in hoc negotio causam concurrentem, merito primam in ordine nominamus Urinam, salinis acribus partibus notorie refertam, quæ partim copia sua membranosam vesicæ substantiam distendit, partim pungendo aut vellicando in tunicam nerveam, tanquam vesicæ interiorē, agit; eoque ipso motus speciem in illa excitat, qui per nervos hic excurrentes & supra iam notatos ipsi Animæ communicatur, ut ideam sibi formet de molestia sensus percepti, quo ipsa ad voluntatem exeernendi permovetur, eamque ob causam, aliam motus speciem per eosdem nervos suscipit; in ipsam vesicam redundantem; & specialiter in fibras carneo musculosas se exferentem, quo illæ stringuntur, ut parietes aut latera vesicæ ad invicem comprimantur, & materia intus contenta sub illa compressione per aperturam proximam, in urethram hiantem expellatur. Sub hac expulsionē materiæ inclusæ necessario collum vesicæ, & cum ipso simul fibræ sphincteris exterius circumpositi dilatantur, quæ ad dilatationem subeundam partim a liquido seroso aqueo, partim a mucida substantia, perpetue hic e glandulis per tunicam nerveam dispersis secreta, disponuntur, ut tanquam flexiles & molles materiæ transeunti cedere possint; cessante autem materiæ distendente & effluente iterum coarctari. Siquidem autem motus hætenus descripti, ad totum negotium absolvendum, fere insufficientes essent, nisi aliarum quoque partium vicinarum & connexarum motus concurreret non minus a voluntate dependens; hic etiam partium consensus, in naturali earum connexionē fundatus symbolum suum confert: notissimum enim est ex anatomicis, Vesicam urinariam non



libere in abdomine fluctuare, sed partim lateraliter per expansionem membranaceam, partim superne per Urachum, cum peritonæo, & hinc cum musculis abdominis, cohære: cum itaque peritonæum per totam inferiorem cavitationem expandatur, eoque ipso Diaphragmatis quoque faciem inferiorem obvolvatur; non dubitamus, a motibus supra descriptis per peritonæum & abdominis musculos, & Diaphragma affici, quo ipso natura excitatur ut majore intentione huc quoque motus suos extendat, eosque voluntarie ibi exerceat, quos quisquam in proprio corpore sub aëris compressione, & nisu musculorum abdominis pressorio experiri poterit. E quibus facile liquet, quantus in homine vivo sit Mechanismi & Organismi nexus, atque necessarius concursus; Medicum maxime docens, quomodo ipsi in evacuationibus per artem provocandis incumbat, ut ipsam naturam organico mechanice operantem pro viribus sequatur, ejusque ordinem sequendo, excretiones naturales forsitan aliquando deficientes, per debita & legitima adminicula atque remedia excitare aut provocare valeat.

#### §. VI.

Quod, si ad præsentem materiam adplicare velimus, facile sequitur, in Diureseos provocatione medicum eo respicere debere, ut talia sibi accersat remedia, quibus simili modo, quo natura utitur, hanc evacuationem promovere possit. Sint autem remedia diuretica necesse est talia, quæ vel relaxando & emolliendo renum substantiam afficiunt, eamque paulo laxiorem reddunt, quo tanto citius transitus materiæ serosæ ad pelvim renalem contingat, & secessio Urinæ a sanguine absolvatur: vel quæ salinas particulas in humoribus materialiter augment, quæ cum sero copiosius ad renes delatæ in ipsis stimulum ad motum leniter strictorium producant; quo materia secreta majore impetu & copia ad pel-



Pelvim protrudatur: quem tamen effectum in renibus non solum exerunt, sed, quoniam in Urina secreta manent, imo pro re nata concentrantur, ad Vesicam quoque per urethres vehuntur, ibique eundem effectum stimulatorium edunt: vel quæ muciditatem in sero hærentem simul colliquando fundunt, tenuiorem reddunt, & ita ad faciliorem ab humoribus secessionem, & transitum per colatoria disponunt: vel denique talia sunt, quæ sine effectu notabili aut perceptibili alteratorio in humores aut materiam excernendam, specificè quasi sale suo acerrimo & caustico, parcissima licet quantitate assumto, organa secretoria & excretoria ita afficiunt stimulando, ut motus excretorius inde sæpissime in excessu sequatur, gravissimisque subinde symptomatibus stipetur.

§. VII.

Animus non est, totam remediorum diureticorum faraginem nominatenus recensere ac perlustrare; sed satis erit pro scopo præsentè, si cardinales illorum classes, e quibus depromenda sunt, indigitemus. Ad primam itaque classem referimus partim liquida aquea potulenta, potissimum tepide in copia assumta, quorum pertinet potus Thee, Veronicæ, Coffeé: partim oleoso mucilaginosa pingua, quo respectu in hunc finem commendari sueverunt nuclei fructuum varii, Persicorum puta, Cerasorum, Amygdalarum, alique, quorum oleosomucida substantia liquidis aqueis sub forma Emulsionis facile communicatur; quippe quæ fibras optime emolliunt, earumque tonum relaxant, & eo ipso se tanto magis commendant, ubi diureseos defectus a spastica solitarum partium stricture derivari potest. Secundam diureticorum classem subeunt concreta salina puriora tam alcalina fixa, quam acida vulgaria, (exceptis Vitriolicis,) nec minus ammoniacalia urinosa; quo nomine ipse sal culina-



ris, omnesque sales e cineribus plantarum parati, si in debita, aut largiore quantitate assumantur, hunc effectum præstare valent. Ad tertiam pertinent maximopere sales, quos medios vocamus, ex acido & alcalino principio conflati, v. g. Tartarus vitriolatus, Arcan. duplic. Tartarus tartarificatus: imo ipsæ acidulæ ac thermæ, utpote quæ ex hoc principio alvum laxant, æque ac urinæ excretionem promovent. Nec minus tamen huc referri debent ea, quæ partes gummoso resinosas cum salinis permixtas habent, unde in hoc passu plurima quoque diaphoretica positiva e regno vegetabili conveniunt cum illis diureticis calidioribus & activis, quorsum pertinent Terebinthina ejusque præparata; Balsamus Copaivæ; Pareyra brava; Oleum Petræ, succini; & similia. Quartam denique classem constituunt peculiaria caustica & corrosiva; de quibus ex historia practica cognitum est, quod semper in viis urinariis stimulatorium edant effectum, præter quod in fluidis notabiliter aliqua inde alteratio notari possit: cujus generis sunt quædam Insecta, e quibus tamen vix præter unicum in officinis receptum profiat; nempe Cantharides: de quibus notissimum est, quod in paucissima quantitate propinata semper stimulatorium motum in renibus & vesica excitent; in paulo largiore autem quam par est dosi datæ, ardorem, & gravissimum stimulum provocent, quem sæpe arrosio partium interiorum sequitur, cum mictu cruento insanabili.

#### §. VIII.

Hisce generaliter ad hoc negotium spectantibus præmissis, ordo propositi postulat, ut proximius ad declarationem utilitatis, & noxæ progrediamur, quæ ab evacuatione hac, per artificium Medici provocata, sperari, aut metui potest; prout rite aut minus legitime suscipitur. Ubi omnium primo notamus, eam Diureseos promotionem & provocatio-



tionem maxime naturalem esse, quæ per primæ classis remedia obtinetur: dum per hanc methodum, ubi potulenta liquida in sufficiente quantitate suppeditantur, aut per lubricantia viæ disponuntur, naturæ nunquam vis infertur, sed hæc placidissimo modo sui officii admonetur; quapropter hæc methodus omnibus reliquis merito præfertur, & fere sine exceptione in plurimis casibus locum invenit. Reliqua vero remedia, quæ stimulando, motusque excitando effectum suum edunt, majorem requirunt medici circumspectionem, ne errorem aliquando committat; & loco sperati boni successus malum eventum cum ægrorum damno experiatur. Ut itaque legitimus Diureseos usus, æque ac ipsius abusus innotescat, haud melius pro nostro scopo actum iri confidimus, quam, si utilitatem ejus ex indicantibus, noxas autem ex contraindicantibus deducamus atque monstremus. Sustinemus igitur primo auctiorem Diuresin necessariam ac utilem esse, quando generaliter in toto corpore humorum seroso aquosorum ad muciditatem pronorum & inclinantium colluvies & copia abundansprehenditur. Hoc nomine locum habet generaliore respectu in temperamento phlegmatico puriore, & omnibus reliquis, quæ de illo multum aut notabiliter participant: sicut enim humores serosi per se ad murescentiam inclinant, ita lymphæ & sanguini permixti his quoque facile eandem contrahunt labem, præcipue cum subjecta phlegmatica præ aliis torpidiora existant, & ad laboriosos motus, quibus ceteroquin humores magis attenuari possunt, minus inclinent; & sub illa murescentia ut plurimum corruptio humorum falsa ortum ducere soleat; quæ postmodum variis ægitudinibus hinc oriundis januam pandere apta est. Ubi simul notamus; respectu selectus remediorum diureticorum; quod in hoc casu solis liquidis, aut oleoso mucilaginosis, parum efficia-



efficiatur: quamvis enim pro dilutione humoris serofi aliquid præstare possent, nihilominus tamen hic loci sui commendationem positivam haud merentur, & quidem eam ob rationem, quod tonum partium solidarum magis magisque relaxent, eoque ipso ob atoniam inductam, hanc excretionem sufflaminent magis quam promoveant; ad quam non solum materiæ mobilitas & fluxilitas, sed simul viarum quoque debitum robur tonicum requiritur. Unde hic magis sese commendant, partim salina mediæ indolis, quæ humores mucescentes liquant funduntque, & stimulum simul partibus solidis imprimere valent: partim resinosogummosa, sale acriusculo prædita; quippe quæ aptissima sunt, ut in humoribus, æque ac in viis secretioni & excretioni urinæ dicatis, debitum effectum exserant.

#### §. IX.

Deinde utilem non modo, sed necessariam quoque Diureseos provocationem existimamus, quando cunque in corpore, ejusque massa humorum impuritas salina, aut salino mucida notorie præsto est, & vel morbos produxit, vel sub morborum præsentia generata est, sui que excretionem urget & indicat. Ex hoc fundamento hæc excretio maxime proficua est in Febribus; & quidem præcipue in catarrhalibus; quæ ordinarie ab impedita & suppressa transpiratione peripherica originem ducunt: unde partes salinæ per cutim excerni solitæ in humoribus & sanguinis massa augentur, & propter stricturam habitus corporis justo majorem, circa internas partes detinentur, &, ne hic loci tanquam in tenerioribus partibus, acrimonia sua damnum irreparabile producant, naturæ ansam præbent, ut motibus secretoriis & excretoriis contra illos insurgat extraordinariis, easque e corpore eliminare studeat: in quo negotio neque proximius neque aptius reperiundum est organum secretorium



rium quam renes, quippe qui ejusmodi secretioni & excretioni salinæ semper vacant; atque ab illis particulis in comparatione ad reliquas partes, minimum afficiuntur. Nec tamen solæ sunt febres catarrhales, quibus hæc evacuatio competit, utilisque existit; sed potius omnibus, licet gradu diverso eam competere, asseverare possumus: in omni enim æstus febrilis paroxysmo sanguis motu celeriore per partes spongiosas transpressus non modo incalescit, sed sub motus intestini orgasmici accessu, tandem in partes salinas, tenuesque serosas, ex parte resolvitur: quæ in corpore manere nequeunt, sed ut excrementitiæ sui proscriptionem postulant: cum autem propter subtilitatis & texturæ diversitatem non per omnia seri emunctoria æque commode ejiciantur, hinc fit ut subtiliores per cutis poros sub sudore excernantur; sed quæ crudiores ac crassiores existunt, aut ob peculiarem aliquando pororum contrariam dispositionem, per corporis peripheriam eliminari nequeunt, ad vias urinarias demandentur, aut si sponte hoc non succedat, per medicam opem huc invitentur: cui scopo tamen in hoc casu magis quadrant diluentia liquida, quam positiva stimulantia; quoniam sub vehementiore sanguinis motu antea jam salinæ partes non solum in copia generantur, sed in acrimonia quoque exaltantur, ideoque dilutionem & contemperationem poscunt; ita tamen, ut in illis febribus, quæ impuritates salino mucidas pro causa antecedente agnoscunt, simul quoque diuretica paulo magis positiva, aut leniter stimulantia concedantur. Simile quid indicant illi affectus morboosi, quorum causa in humorum lymphatico serosorum discrasia falsa aut mucida jure quæritur, quorsum referuntur scabies, aliæque cutis externæ ab hac causa dependentes deordinationes: nec possumus, quin idem dicamus de affectibus vere scorbuticis, imo etiam sub certo re-

C

spectu



ſpectu de venereis, ut pote in quibus peculiaris mucida humorum ſpiſſitudo occurrit, quæ resolutionem, & fuſionem quaſi liquatoriam per remedia ſalina & acriuſcula reſinoſa requirit, ut poſtmodum, reſolutis muciditatibus, ſalinæ partes tanto promptius ad vias urinarias devolvi, ibique ſtimulo excretorio adaucto, excretionis viam inveniant.

### §. X.

Pariter quoque huc referimus affectus bilioſos, quod nempe Diureſeos auctiorem provocationem tolerant non modo, ſed poſitive ex petant. Cum enim ſub ordinaria urinæ ſecretione non ſolitarie partes ſalinæ, mucidæ, & terreſtres, ſed oleoſæ ac ſulphureæ bilioſæ, per ipſum odorem ſeſe manifeſtantes, ſecedant, facile hinc adparet, Medicum legibus naturæ non contrariari, ſi bilioſarum partium in ſanguine hærentium eliminationem per vias urinarias aliquando intendat. Etiamſi enim non ſuſtineamus, hanc evacuationem ſolitarie ſufficientem, nedum ſemper principalem aut primariam eſſe, tamen non impedit, quin neceſſariam illam ac utilem declaremus, ubi craſſiores & plurimæ partes per alvum jamjam excretæ ſunt, paulo tenuiores autem in humorum maſſa deliteſcunt, nec propter facilem ſanguinis commotionem orgaſticam metuendam ad cutis excretoria organa transferri poſſunt: aut ubi partes bilioſæ jamjam motu extraordinario ad ſanguinis maſſam translata exiſtunt, ſuæque præſentia & motu, ipſius craſin lædunt, variosque effectus noxios producunt. Hinc illarum exterminationem per urinam ſuadere & commendare poſſumus, tam in febribus bilioſis, quam in affectibus ictericis, ea intentione, ut partes illæ ſulphureæ tanto citius ac promptius cum urina per organum paulo laxius tranſeant, & a ſanguine abſcedant, nec per multas ambages anguſtiorum



colatoriorum transprimi necesse habeant, & plus laboris atque periculi œconomix animali faceffant.

§. XI.

Quemadmodum in superioribus diureticos provocacionem commendavimus in generaliore humoris serosi abundantia ; ita longe magis illam suadere decet in actuali ipsius collectione aut extravasatione præternaturali, sive illa particularis, sive magis universalis fuerit. Quo intuitu in considerationem veniunt omnes affectus hydropici & leucophlegmatici, cum tota tumorum oedematosorum familia. Etiam si enim nos non lateat, hanc evacuationis speciem non unicam esse, quibus hydropicis & oedematosi opitulamur, facile tamen illam haud infimam esse, asserere possumus: cum toto die videamus, in omnibus hisce affectibus evacuationem serosi humoris per corporis peripheriam esse difficillimam, licet humor evacuandus sub cute hæreat; & quamvis multum sæpe ipsius per alvinas excretiones exoneretur, hanc tamen ad constantiorem curam raro sufficere, nisi diuretica evacuatio largius succedat. Dubium equidem hic moveri posset, circa effectus certitudinem, ex fundamento incertitudinis viarum manifestiorum, per quas serum extravasatum ad vias urinarias resorberi ac revehi possit, verum tamen dubium circa historiam facti facile resolvitur per experientiam quotidianam, licet de vero ac specialissimo modo nondum adeo certi simus: sicuti enim in potatoribus strenuis aquosa humiditas longe citius ad organum urinæ excretorium pervenit, quam per ordinarium secretionis modum possibile esset, etiam si veræ viæ nobis nondum sint cognitæ, per quas tam cito delabitur; ita quoque simili forsan modo serosa humiditas ad vias urinarias, per loca nobis adhuc incognita transire poterit: ut taceamus illum modum, quem Medici diapedesis vocant, & quem



omnino negare haud licet. Scimus enim, serum naturaliter constitutum humorem esse tenuem & fluxilem, qui per peculiaria vasa separatim in corpore non vehitur, sed quaquaversum per poros membranarum partium facile transudat, & hoc ipso modo etiam extravasationem subit: nec desunt ex anatomicis, qui poros vesicæ urinariæ singulariter conformatos esse asserunt, ut nempe ab extra quidem humiditatem admittant, nullam autem ab intra foras transmittere possint: quod, si utrumque concilietur, facile allegatam diapedesin feri per membranas tunicasve vesicæ urinariæ stabilire & confirmare potest, ut ita nil amplius requiratur, præter stimulum excretorium in vesica excitandum; qui tanto commodius in effectum deducitur, quo magis in hunc finem eliguntur diuretica ex salium alcalinorum & mediorum familia prolecta, cum blandioribus resinosis alternata. Hæc enim optima sunt in hoc genere, cum non modo stimulum exercent, roburque tonicum augeant in partibus solidis, sed antea materiam excernendam, si forsan mora temporis plus justo mucida facta fuerit, mobilem reddant, colliquant, & fluxilitatem ipsi concilient, quo tanto aptior evadat ad transgrediendum, & successive tanto promptius citiusque poros tam peritonei, quam vesicæ urinariæ penetrare valeat.

## §. XII.

Ultimo tandem loco diureticæ evacuationis promotionem aut provocationem urget & indicat actualis Urinæ suppressio atque retentio: hac enim præsentē, si naturalem necessitatem & utilitatem diureseos respiciamus, sane magis naturalis iusta & æqua conclusio & indicatio formari nequit, quam illa, quod defectus ipsius sit relarciendus, & excretio ad statum naturalem sit revocanda; id quod tamen fieri nequit, nisi per causarum antecedentium, aut continentium

remo-



remotionem. Sunt autem hæ causæ variæ atque diversæ; alio enim tempore subesse potest sola ductuum secretoriorum obstructio a materia mucida: alio vero infarctus sanguinis in renibus aut stasis inflammatoria, quale quid in nephritide simplici & calculosa accidit: cum alibi ipse calculus vel in renibus, vel in ureteribus, aut urethra hærens, causam suppressionis Urinæ constituat; aut spastica viarum urinarum strictura a dolore vel alia causa prægressa, tanquam causa præsto est; quæ fere semper adesse solet, ubicunque nephritis, aut verus calculus adsunt, nec non extra hos casus præsens esse potest, si forsan per consensum ab aliis partibus vicinis spasmus in has quoque partes redundat: quale quid aliquando contingit sub tenesmoideis intestini recti tractionibus; pathematibus hæmorrhoidalibus, præcipue externis, & colicis passionibus spasmoticis. Possumus optimo quoque jure huc referre, & inter diureseos provocationem indicantia reponere, præsentiam materiæ apostematicæ, aut ulcerosæ in renibus, aut vesica urinaria hærentis: quamvis enim sensu strictiore ad hanc excretionem & quidem naturalem ac ordinariam non pertineant, eo tamen sensu huc pertinent, quod sine Urinæ excretionem evacuari nequeant, sed una cum illa e dictis locis eliminari debeant. Ut autem in modo citatis casibus finis obtineatur optatus, necessitas & medici prudentia requirit, ut pro diversitate causarum negotium instituat, vel per diluentia, mucidam stasim attenuando, fluxilemque reddendo, vel sub eadem intentione per salina tam alcalina, quam neutra: vel per emollientia & lenientia, quæ spasmus in nervis & fibris demulcendo, vias liberiores reddunt, & ita materiæ transeunti liberum quoque transgressum parare possunt: quibus aliquando succurrere debent



resolventia, quæ stases sanguineas inflammatorias discutere atque resolvere valent; aut abstergentia & mundificantia, quæ potissimum in subsidium vocantur, in abscessibus aut ulceribus, vias urinarias occupantibus: his enim si materia extra ordinem præsens non præparetur, & a substantia renum aut vesicæ separetur, frustra tentatur evacuatio per usum diureticorum, præcipue si paulo activiora & acriora fuerint: satis facile enim hinc quidem succedet stimulus excretorius in alterutra parte, aut in utraque; verum, cum hic non tam urinæ quam hujus materiæ peregrinæ evacuatio cum urina intendatur, eventus spei haud respondere poterit, nisi præparata prius fuerit materia specialiter evacuanda; sed potius a nuda stimulatione acriore graviores dolores in parte læsa orientur. E quibus omnibus hætenus propositis facile quisquam perspiciet, Diureseos facilitationem ac promotionem varium & diffusum satis habere ulum in praxi medica: sed pari facilitate ex iisdem neminem latere posse speramus, quod positiva diureticiæ evacuationis provocatio longe minorem præse ferat utilitatem ac necessitatem, præcipue, quæ fortioribus, acrioribus, & calidioribus remediis suscipitur: imo bona fide asserimus, valde raros esse casus, ubi Diuresis directe, solitarie, & positiva intentione exstimulatoria suscipi debet aut potest; quin potius asseveremus, plurimos ex allegatis casibus ita comparatos esse, ut maximam circumspectionem medici requirant, imo positivam eiusmodi diureseos provocationem, per stimulantia & acriora diuretica penitus non tolerant, sed ab iisdem varias noxas accipiant atque reportent: id quod in sequentibus fusius explicare ordo postulat.



§. XIII.

Quando itaque de noxis diuresin provocatam insequentibus loquimur, sermo nobis non est de illa specie provocationis, quæ per sola diluentia, aut emollientia & lubricantia efficitur, sed de illa provocatione positiva, quæ stimulantibus, acrioribus, resinosis, calidis, aut causticis suscipitur, & ad hanc ea quæ mox dicenda veniunt, restricta volumus. Nullatenus igitur locus est Diureticis positivis stimulantibus, ubi debita materiæ excernendæ præparatio neglecta est, haud enim sufficit sola materiæ, vel salinæ, vel mucidæ, vel apostematice & ulcerosæ, vel denique sabulosæ & calculosæ præsentia, sive illæ generaliter in humoribus, sive hæ specialiter in viis urinariis hæreant, nisi prius materiæ movendæ, & quæ præparari possunt, mobiles reddantur, & ad exitum disponantur. Unde semper præmitti debent vel diulentia, vel incidentia & digestiva, antequam ad ipsa stimulantia accedamus: hoc enim si non observetur, & materia excernenda adhuc in humoribus hæreat, renes ac vesica frustra stimulantur, eoque ipso facile sanguinis copioso influxui, infarctui, & stagnationi, imo circa renes præcipue nephriticis passionibus ansa datur: aut si materia expellenda in viis urinariis hæret, facillimo negotio firmitus impingitur, a spastica strictura per stimulationem in partibus solidis excitata. Hæc materiæ præparatio respectum quoque habet ad Febres: cum enim in superioribus dictum sit, in febribus etiam Diureticam evacuationem suam præstare usum, in hoc negotio probe attendendum est, hanc quoque evacuationem, licet in febre utilissimam, non quovis tempore æque facile & æque utiliter succedere, sed cum diaphoresi hoc commune habere, quod maximam partem finitis febrium paroxysmis, & post mitigatum æstum



æstus, ab ipsa natura instituantur, ac promoveantur; eo-  
que ipso testentur, materiam illam excrementitiam salino-  
sulphureo serosam in humoribus hærentem non statim sub  
primis motibus secedere, sed ad secessionem promptam ac  
facilem disponi debere; id quod a natura absolvitur per  
motus, quibus sanguinea massa sub æstu febrili per partes so-  
lidas & spongiosas fortiter transprimitur atque trajicitur, ut  
inde sanguinis & lymphæ attenuentur, partesque heteroge-  
næ resolvantur, & e reliquo spissiorum humorum nexu dis-  
solvantur, quo tanto melius sub forma liquidiore & tenui-  
ore in tubulos, aut poros organorum secretoriorum & ex-  
cretoriorum penetrare valeant. Hinc merito prudens Me-  
dicus naturam sectari debet, & ubicunque etiam in feбри-  
bus e re sua duxerit, diuresis ut provocetur, omnem eo-  
curam intendere, ne motus ordinemque naturæ antevertat,  
& prius motus excretorios suscipiat, atque promovere stu-  
deat, quam per præparantia præmissa naturam adjuverit, ma-  
teriam mobilem fecerit, & per temperationem æstus feбри-  
lis infarctus sanguineos, & fibrosarum partium compressio-  
nes, vel ut aliis loqui placet, spasmos removerit, & ita par-  
tim materia movenda, partim viæ dispositæ sint, ut ex u-  
traque parte negotium feliciter succedat.

#### §. XIV.

Non autem solum hæc cautela restringenda est ad so-  
los paroxysmos febrium, sed certo respectu ad totam febrem  
ejusque periodum, præsertim si febris de continuarum & a-  
cutarum classe fuerit: in his enim toto die experientia lo-  
quitur atque testatur, secessionem heterogenearum partium  
per urinam haud facile primis sub paroxysmis, & sub febris  
incremento succedere, sed tum demum in conspectum pro-  
dire, quando per notabile tempus febris deferbuit, & ad criti-



critica tempora pervenit, ubi successive, & quo magis ad declinationem tendit, urina turbida evadere, & de faciliore partium heterogenearum sequestratione testari solet, aut quo magis tempestive, & ante tempora critica alias consue- ta tale quid contingit, eo majorem de citiore febris termina- tione spem suppeditat. Quod sicut in acutis evenit, ita non minus in chronicis quoque & intermittentibus observatur; quo magis enim per plures paroxysmos materia peccans sub- acta est, eo certius insequentibus tam per cutim, quam per vias urinarias exterminatur: aut si sub primis statim paro- xysmis per dictas vias saburra salino mucida ejicitur, tanto præsentius de materiæ peccantis, vel paucitate, vel mobili- tate, & simul de feliciore ac faciliore febris superatione, perhibet testimonium.

§. XV.

Id quod de compressione fibrarum, & hinc pendente impedita urinæ secretionem sub æstu febrili diximus, hoc quo- que valet de statu insigniter plethorico, præsertim in habitu corporis apparente. Sicut enim Plethora in genere, tam vasa, quam fibrarum interstitia turgescere facit, eaque ex omni parte implet, ita necessario fibræ inter se invicem coar- ctantur, secretoria & colatoria organa interspersa compri- muntur, aut vasa interjacentia intercipiuntur, ut facile hinc inde restagnationes & stases ortum capiant: tanto magis au- tem hoc fit, si plethora physice præsens simul commovea- tur, & sanguis a causis variis expandatur. Simile quid ali- quando accidit ab abusu diureticorum calidiorum, & fortio- rum, v. g. terebinthinatorum præparatorum, olei nempe & spiritus, olei quoque Petræ, Succini, aliorumque subtiliore resinosa substantia cum sale stimulante scatentium, præcipue ad modum vulgi largiter assumtorum: haud enim ignota sunt



ex praxi vulgari exempla, ubi ab improvido illorum usu, sub doloribus lumborum, & hinc formato metu de calculo renali subjecta in gravissimas commotiones febriles, & simul urinæ suppressionem, cum ardore ipsius, conjecta sunt; ex nullo alio fundamento, quam quod sub plethora eximie commota sanguis quoque majore impetu ac pulsu ad renes delatus atque protrusus, per vasorum ac tubulorum compressionem, & hinc accedentem spasmus, ipsam urinæ secessionem impediverit. Unde sub his etiam circumstantiis suademus necessariam circumspectionem circa ejusmodi remediorum applicationem, ne citra necessitatem aliquando symptomata provocentur aut augeantur, & necessariae secretiones cum excretionibus intercipientur.

#### §. XVI.

Longe magis adhuc peccatur in hoc genere, si actu jam stases inflammatoriæ circa renes præsto sint, & ægri Nephritide laborent. Siquidem enim nulla stasis inflammatoria facile sine febre occurrit, ita neque hæc sola adesse solet, & præterea ordinarie subjecta plethorica præ aliis corripit. Sub hoc rerum statu facile quisque percipiet, tunc temporis plus quam ordinarie sanguinis circa regionem renalem hære, & sub congestione huc facta compelli, quo partim renes & vasa renalia, partim muscoli vicini distenduntur, & ad varias spasticas tractiones occasio suppeditatur, quibus viæ secretionis urinæ comprimuntur, arctantur, & ita secessio materiæ separandarum sufflaminatur. Quod si itaque in tali rerum statu supra citata indolis medicamenta diuretica calida & acria desuper exhibeantur, quid quæso inde expectari potest, quam inflammatoriæ staseos augmentum, spasmorum incrementum, commotionis orgasticæ atque febrilis exacerbatio; immo aliquando tanta sanguinis

ad



ad hæc loca congestio, ut vasa renalia sanguifera suum officium amittere cogantur, sanguinem dimittant, ut in pelvim descendat renalem, mictumque cruentum constituat. Cujus rei in memoriam incidit exemplum de Viro quodam plethorico, infarctu aliquo sanguinis circa regionem lumbarem laborante, tunc temporis quidem levioze, verum tamen dolores pressorios & tractorios in lumbis causante: hic metu, ut fieri solet, percussus, dolores hos calculi prodromos esse, consilio fratris sui, qui theologus erat, & aliquando etiam rem cum medicis habebat, interne repetitis vicibus aliquot guttas Olei Petræ albi assumebat, & simul externe regionem lumbarem Linimento ex Ungv. Dialth. Ol. Succin. Laterino; Petr. rubr. inungi curabat: quibus adhibitis dolores & spasmi adeo augebantur, ut ex dolore ischiadico incedere non solum nequiret, sed intra biduum Mictu quoque cruento gravissimo corriperetur; ut sane multum laboris medico accersito inde emergeret, antequam periculosum hunc affectum debite debellaret. Quod unicum exemplum, licet plura in medium afferri possent, satis esse potest, pro demonstranda & confirmanda superiore veritate.

## §. XVII.

Adhuc major requiritur circumspectio, & longe minus concessa est diureseos positiva provocatio, quando non simplex nephritis adest, sed talis, quæ a sabulo præsentente, aut veris calculosis pathematibus oritur, & quæ ex præsentia spasmodorum dolorificorum graviorum agnoscitur: in quo casu semper eo respiciendum est, ut spasmi leniantur & demulceantur, fibræ strictæ relaxen-



tur & emolliantur, quo facto longe facilius urinæ æque ac fabuli excretio sequitur. Unde hoc intuitu nitrosa & cinnabarina, cum diluentibus, aut emulsivis juncta, plus sæpe præstant, quam fortissima diuretica, a quibus nil nisi spasmodorum exacerbatio sperari potest; cum fabulosa & calculosa materia ordinarie firmitus impingatur, & tanto magis Urinæ progressum per vias urinarias impediat. Longe gravius autem imo gravissimum damnum ab usu fortiorum & positivorum diureticorum emergit, quando calculus, præsertim grandior, aut asperior vel in renibus ac Ureteribus, vel in Vesicæ collo aut urethra firmiter impactus hæret: hoc enim præsentente portio illa ubi calculus hæret, distenditur, aut premitur, eoque ipso fibræ partis molesto sensu afficiuntur, quem necessario, modo superius descripto, sequitur spastica superioris & inferioris regionis strictura; sub qua calculus firmiter in ea parte detinetur, nec prius ex eo loco dimittitur, quam spasmus ad minimum in inferiore parte relaxetur. Quodsi itaque intali rerum statu Diuresis per remedia diuretica positiva urgeatur, & hæc operationem suam stimulatoriam in vias urinarias edant, fibræ magis adhuc stringuntur, & calculus tanto magis in loco detentionis obfirmatur. Quapropter Medicus hic sibi caveat, ne intempestive suscepta diuresi Urinæ confluxum vel in Ureteribus, vel in Vesica adaugeat, egressum autem ipsius ut & calculi nullo modo promoveat: haud enim deficiunt observationes de Vesica Urinaria in tali casu rupta, mortemque repentinam comitem habente. Etiam si enim aliquanto facilior res sit, quando calculus alterutrum occupat ureterem, dum ex altero atere libera manet transeuntis urinæ via, nec tum urethra a calculo occupata est; tamen minus certus esse potest

est



est Medicus de spasmodum subsequendum gradu atque effectu, præprimis in subjectis choleris & sensibili- bus: de certitudine enim spasmodum subsequendum fere nullum unquam remanet dubium, de quibus certo in antecessum suspicari licet, quod graviores fieri possint, cum causa illorum reduplicetur: quod autem effectum illorum attinet, satis frequens testatur experientia, quod a renibus per ureteres ad vesicam usque sese extendant, & propter nexum partium ita continu- entur, ut ipsa quoque urethra, aut vesicæ collum con- stringatur, quamvis nullus hic hæreat calculus.

§. XVIII.

Non equidem negamus rem esse difficultatis plenam in hoc negotio, cum Medicus corpus introspicere nequeat, & certo scire, utrum calculus grandior, aut minor in renibus, aut ureteribus hæreat; ideoque objectionem formari posse, dubium nos reddere Medicum, ut nesciat quidnam in tali casu agere debeat: ad quod respondemus; apodicticam quidem certitudinem de magnitudine, aut asperitate cal- culi liquido non adesse; hoc tamen certo Medico con- stare posse, partim ex signis pathognomonicis, & sympto- matibus, partim ex reliqua ægri relatione de morbo jam consueto, quod præsens sit calculus: porro ex dolore in unica particula constante gravissimo, quem ægri accura- te in tali casu testari solent, scire posse Medicum, cal- culum, sive minor, sive major fuerit, infixum atque impactum esse, & in itinere suo vel ab angustia naturali, vel spastica stricture ureteris, vel valvula intercipiente impediri, & hinc concludi posse, præsentem tali causa haud licitum esse stimulum addere viis, cum spasti- ca stricture hinc majus capere possit incrementum: sed



potius allaborandum esse, ut internis externisque remediis demulcentibus, antispasticis, clysteribus, fomentationibus, balneis, linimentis emollientibus, viarum strictura removeatur, spasmus relaxentur, & ita calculi impacti progressus facilitetur, quo facto urinæ successus sponte sequitur.

### §. XIX.

Sicuti autem ratione renum & ureterum aliqua subesse potest difficultas, ita majore certitudine medicus judicium ferre potest in altero casu, quando nempe calculus urethram occupat, hic enim sæpius tactu, imo aliquando visu dignosci potest, tantoque certiore reddere medicum, quid ipsi sit faciendum: nec adeo magna subest difficultas, si calculus vesicæ præsto sit, etiamsi in ipsa urethra non hæreat, sed exitum saltem vesicæ tegat, & situ inconveniente urinæ egressum sufflaminet, cum ex symptomatibus comitantibus hoc facili negotio dignoscatur. In omnibus hisce casibus nequaquam concessum est stimulantibus diuresin urgere: nil enim certius inde sequitur, quam spasmorum exacerbatio, quibus vesica in superiore sui parte versus exitum constringitur, & calculus tanto firmitus hic detinetur, ipsaque urinæ excretio intercipitur, quoniam spasmus non in solo vesicæ fundo remanent, sed ad collum usque extenduntur, ut ita calculus ex omni parte inclusus, neque egressum propter loci angustiam, neque regressum ob spasmos impediens inveniat: nec vanus hic occurrat metus de succedente in his partibus inflammatione, quæ facillimo negotio in sphacelum degenerare, agros-  
que



que in maximum vitæ discrimen conjicere potest ; ut ta-  
ceamus de læsione continuitatis, quam calculus asperior  
sub affricu inferre, simulque dispositionem ad ulcera-  
tionem partis insanabilem producere valet. Hinc itera-  
to suademus, ut sub dictis circumstantiis cautum se ge-  
rat Medicus, ne ex sua culpa malum morbosum gravius  
reddat, ægrumque attentata medela plus lædat, quam  
ipsi opituletur.

§. XX.

Verbum etiam ultimo loco adjicimus de Diuresc-  
os promotione instrumentali chirurgica, per Catheteris  
adplicationem ; qua mediante Urinam aliquando ex sola  
vesica subtrahere solemus, quando secretio illius quidem  
illibata, excretio autem læsa existit : id quod potissimum  
fieri solet quando calculus vesicalis, aut etiam renalis, ex-  
itum præcludit, sui que retrusionem poscit, aut quando  
in foeminis gravidis aut parturientibus collum Vesicæ  
compressum urinæ exitum non concedit. Ubi breviter  
notamus, neque hunc modum semper adplicabilem esse,  
aut concessum, sed debitas quoque requirere cautelas, ma-  
ximopere in eo fundatas, ut sub instrumenti applicatio-  
ne omnis evitetur violentia intrusionis ; ne dolores &  
spasmi, aut inflammationes inde in collo vesicæ nascan-  
tur : ne nimis sæpe & citra necessitatem, ob eandem ra-  
tionem, repetatur instrumenti admissio : & quod omni-  
um minime sit adhibendus Catheter, quamdiu in collo  
vesicæ notabilis deprehenditur spasmus, aut ipsius exul-  
ceratio, cum in tali casu vix possibile sit gravissimorum  
dolo-



dolorum excitationem evitare, quos omnia illa incommoda, quæ in superioribus notavimus, sequi facillimo negotio possunt. His ita expositis atque deductis, præsentis Dissertationis scopo satisfactum esse confidimus, eamque ob causam gratisfima recolimus mente Summi Numinis benignitatem, quod vires pro voto nostro concesserit, illudque iteratis vicibus precamur, ut laborem nostrum in sui gloriam, proximique emolumentum, cedere benignissime concedat.

F I N I S.

